

## In Eedi'in Ta'nin Paul-di Timothy Ônta'nannin

<sup>1</sup> Naa Paul-á Jesus Christ-ví t'ôekhuwa?i-ân omuu, Yôesi Tádá natsónpóedí kí'bi' omúni'in, hedânho t'owa dovâyt'ôe'âamídí Yôesi Tádá iví tuu imăgi'in to'wên Christ Jesus-ví'piye' dívíwhăyunde'indáho in wówátsi nahándepe'in ovâymaäní.

<sup>2</sup> Nă'in ta'nin naadi u Timothy wînta'do?, u-á naví ay waagibá wíchaa hedi wiséegi. Yôesi na'inbí Tádá-ádi hedá Na'inbí Sedó Jesus Christ-ádi séegísehkană wóemăäní, hedá uví'piye' nasehkanăpúwí, hedá wóekhăge?namí ánsaaginpidíbo? uncha'nídí.

*Timothy-ví'gedi Paul i'ánshaamáadi Yôesi Tádá óeku'daa'o?*

<sup>3</sup> Naa Yôesi Tádá dókú'daa'o?, i-á namuu iví t'ôe dônkanmăa'i?, hedi dînhanginná pín ta'ge haydi kin dáy'o'in, naví thehtáy pahpá'in díví'an waabá. I dókú'daa'o? u' unmuudi, khuu-á thaa-á ugí' dáyýúusu'odi.

<sup>4</sup> Naa hânho oda' wíyá wímúni'in hedânho ohíhchanpúwídí, uví'gedi báyékí ánsaa dînpóya'di háa bisíhtăä'in änwiye íhaydi.

<sup>5</sup> Hedi dáy'ánshaa'o? háa Jesus-ví'piye' ta'gendi biwhăyunde'in. Páadé uví sa'yâa Lois hedáhá' uví yíyá Eunice-á inbí pí'nă kó'yé-á dănwăyü, hedá naa dînhanginná u-á wá' hanbá biwhăyunde'.

*Paul-di Timothy óetu'an Yôesiví tuu t'owa híwó' ovâyt'ôe'amídí*

6 Hedânkun u wí'ánshaakannamí, naa uví p'ó'dé dáymank'û' ihaydi Yôesi Tádádí wí hääwí wóeyôn mân'amídí. Nää wiyá bipimääni hä'i t'ôe híwó' mân'âamídí, páadé ihaydi bitsiye'o waagibá.

7 Yôesi Tádádí na'in khuwôeda' wídmägipi na'inbí pí'nä khó'yé, hewänbo kay-áho dímä', hedá díkhäge'do t'owa âyséegímá've-ídí, hedá hangintandá dímä' na'inbí wówátsi híwó' âyhúuwídí.

8 Hedího wí'unwôeda'ípi Nanbí Sedó Jesus-ví'gedi t'owa ovâyt'ôe'amídí, hedá wídmâwôeda'ípi tobá iví t'ôe dôn'odibo dípansóge wänbo', hewänbo shánkídí naa t'ôephade iwe o'ân waagibá un wá' unkhâymuní mänt'ôephadé-ídí Yôesi Tádáví híwó'di tuu t'owa ovâyt'ôe'amídí, hedí Yôesi Tádádáho kay wóemääni kin bi'amídí.

9 Idânkunho na'in dîn'aywon hedá iví'indá' gimúnídí dítukánnan. Hedí kin i'an wên háawên iví'annin namuudida'ba yoe, hewänbo báyéki séegísehkanä imáadân. Hân'oebo wa' hääwí nakhí'yenpídíbo wí'bo i'ánshaamägi kin i'amídí, Christ Jesus-di dínkhâymaa'in namuudi.

10 Hedí nääho Yôesi Tádádí nã'i séegísehkanä na'in dínkeeyan Christ Jesus-á napówá ihaydi dîn'aywoenídí. Christ-dáho in chuwa namuu'in na'inbí'wedá dînyâa'an, hedá handidá dínkeekw'ódi hádídí Yôesi Tádáví híwó'di tuu âywhäyundedi nã'in wówátsi nahândepí'in âykéyídí.

11 Hedí Yôesi Tádádáho naa dísóge t'ôekhuwa'i-á

hedá háhkandi-á omúnídí, iví híwó'di tuu ûnmuu i'gedi t'owa dovâyt'ôe'âamídí.

12 Hedi ná'i t'ôe dáy'o'i namuudi naa t'ôephade iwe nää o'ân. Hewänbo tobáháa kin dînpó' wänbo wó'wôeda'pí, dînhanginnândi to'wíwí'piye' naa dáywhäyunde'in, hedá híwó'dá dînhanginná i-á ûnkoedi'in i hääwí iví mange dônyoe'andi' dîn'âyîngi'amídí i t'ä'gi thaa napówá píhay.

13 Naadi wînthayyan háawin in ta'gen háhkan namuu'in, hediho u-á úkhây'ä' ná'in háhkan diwebá bitsaakêeni'in. Hedi kin bi'odi in whäy-u-á in séegí-á Christ Jesus napäyi'i nâahûwí.

14 Ná'i híwó'di hääwí Yôesi Táđáđí uví mange wônyoe'andi' män'âyîngihûwí. I Yä'dâa'i P'oewaahâa na'inbí pí'ná khó'yé gínthaa'idáho wóekhêge'namí kin bi'amídí.

### *Wáy wêndi Paul óeyoe'an hewänbo Onesiphorus-dá yoe*

15 Úhanginná t'ähkí in Asia nangewin t'owadi naa díyoe'an, Phygelus-áđí Hermogenes-áđí indi wänbo díyoe'an.

16 Na'inbí Sedóví'piye' dáyyûusu'o' in Onesiphorus-ví k'aygi'inbí'piye' nasehkanäpúwídí, idá naa háyännanho díbo'aawówá'an, hedá tobá nää pan tewhá ee owhi'ân wänbo wídíwôeda'pí.

17 Nawôeda'íwí'wedí nää Rome-piye' na'ää, hedi napówá ihaydá ihe'yidibo naa dítuwämáa díshaa píhay.

18 Naa dáyyûusu'o' owáy i t'ä'gi thaa napówá ihaydi Na'inbí Sedó iví'piye' nasehkanäpúwí. Ubo

híwóʼ úhanginná, oe Ephesus búuʼú iwe i-ádí naa-  
ádí gayiʼ ihaydi idi báyékí díkhägeʼnannin.

## 2

### *Timothy ûnkâyʼäʼ híwóʼ Yôesigʼ itʼôeʼamíʼin*

<sup>1</sup> Navi ay, Christ Jesus-di iví séegísehkanä  
ûnmuuʼin dímägi, hedí năʼindibá wóekayʼamí.

<sup>2</sup> I hääwí naadi báyékí t'owa dovâyháʼandiʼ  
unt'oe, hedí năä năʼi unt'oeʼibá wây-á t'owa  
ovâyhâhphadé-í, indá díkhâyʼäʼ häädi wänbo  
t'âhki háa dínwóʼnân waa dívíkanhúuwíʼindá  
dimúniʼin, hedáháʼ indá wáʼ díngoedí-í wéʼgeʼin  
t'owa-á ovâyháʼamídí.

<sup>3</sup> U-á wí sundado Jesus Christ-víʼ waagiʼbá un-  
muu, hedího naa dontʼôephadende waagibá u wáʼ  
úkhâyʼäʼ unkhâymuníʼin igíʼ mäntʼôephadé-ídí.

<sup>4</sup> Wí sundado namuuʼi-á waʼdi háa óeyôn waa  
iʼodibo háʼto iwedi iyâaʼamí iʼamídí háa in sun-  
dado dimuupíʼin dívíʼo waagibá, gá iví pʼóʼdédíʼ  
ihíhchannamíʼin nadaʼdân.

<sup>5</sup> Hedá toʼwí iʼádâamáaʼi-á háa ûnkâyʼäʼ waa  
iʼádâaʼopídá háʼto hääwí in ditʼanpoʼin ovâymäʼiʼ  
óemääni.

<sup>6</sup> Hedá wí toʼwí nava iwe báyékí itʼôeʼandi-á  
ûnkâyʼäʼ i páadéʼi namúniʼin i hääwí napaa iwedi  
ihónídí.

<sup>7</sup> Híwóʼ biʼánshaaʼamí năʼi wítumáa iʼgedi,  
hedânho Naʼinbí Sedódí híwóʼdi kaʼpowa  
wóemääni hääwí tʼâhki útáyʼiʼ unkaʼpówá-ídí.

<sup>8</sup> Jesus Christ-víʼgedi biʼánshaaʼamí. I-á nachuu  
wänbo nawáywówápóe, i-á David-ví ây iwediʼibá

namuu. Nă'i-ân namuu i híwó'di tuu iví'gedi t'owa dovâyt'ôe'o'.

<sup>9</sup> Nă'i tuubá namuudi t'ôephade iwe o'ân, hedi wí yanákíkandi waagibá năä pan tewhá iwe owhi'ân, hewânbo Yôesi Tádávi tuu-á ûnkaydi wí'ûnwhimuupí.

<sup>10</sup> Tobá háa naa dînpó' wânbo dáyyä'ä'o' in Yôesi Tádádí ovâyde'mannin dimuu'in dovâykhäge'namídí hedânho in wá' Christ Jesus-di ovây'aywoenídí, hediho hânhay wânbo t'ähki sa'wó'da' naná' diwe ditháa-í.

<sup>11</sup> Nă'i hí' năä otúní'i-á ta'genda' namuu: Christ-ádi gichuudá i-ádíba wáy na'ân diwebá giwówákwo'ní.

<sup>12</sup> Ívít'ôephadeyä'ä'andáho', i-ádi wé'ge gitsonyêení. Hewânbo i wí'âytaapí gin gitúdáho', i wá' natúní na'in wânbo-á wídítaapí'in.

<sup>13</sup> Tobáháa na'in háa gínkhây'ä' waa wí'ívi'angepí wânbo', i-áho háädi wânbo t'ähki háa ûnkhây'ä' waa i'o', gá wí'ûnkoedipídân i'egó'amídí iví hí' natú'in.

*Timothy in ta'gen namuu'in ihûuwí'in ûnkhây'ä', hedi in ta'gen namuupí'indá iyoe'amí*

<sup>14</sup> U-á úkhây'ä' in méesate'in t'owa nă'i háäwí wítu'an ní'gedi ovây'ánshaakannamí'in, hedá Yôesi Tádávi páadépiye' kay'indidá ovâytu'âamí tuu i'gedida' wídívítuhánmá've-ípí. Han dívítuhkanmáadáho' wídínchä'muupí, hedi in to'wên dívít'óyande'inbí ánskaa-á ovâywänpipede'e'o'.

<sup>15</sup> Háädi wânbo uví t'ôe áyîngidi män'âamí hedânho Yôesi Tádá natúnídí híwó' bi'annin,

hedá háa bi'o'in namuudi wí'unwôeda'ípi, hedá Yôesi Tádávi ta'gen tuu ûnmuu'i t'owa ta'ge ovâyt'ôe'âamí.

16 In t'owa Yôesi dâya'ginpí waa dívihée'o'inbí'wedi hedá to'wên inbí hí' dínchâ'muupí'inbí'wedi biyâa'amí. Ha'wâa'i hí'dí t'owa Yôesiví'wedi shánkí ovâyyâa'o'.

17 Wí phée nawówa'pí' nawadedi'dá i khowa óehá'dãndo waagibá, nã'in t'owaví hí'-áho t'âmäpiye' dínwadedi', hedi handidi t'owa ovâyhá'dãndo'. Hymenaeus-ádi Philetus-ádi wên wíye senä' damuu in ha'wâa dívihée'o'in diwedi.

18 Indáho in ta'gen namuu'in diwedi dányâa'an. Kinnân datû': Christ-ví'piye' íviwhäyü ihaydiho giwáywówápóe waabá ho gínpóe, hediho owáy gichuu ihaydáho na'inbí túu'ú wígiwáywówápúwípí. Inbí tuudiho báyéki t'owa inbí whäyü iwedi ovâyyâakanhon.

19 Hewänbo Yôesi Tádávi tuu ûnmuu'i-áho wên kay'in tepú na'ingí' dínk'û' waagi'inbá namuu, hedi iví tã'nin diwe kinnân ûntã'muu:

Na'inbí Sedó-áho ûnhanginná wé'in iví t'owa ûnmuu'in.

Hedá kindá wá' nata'muu:

To'wên t'ähki ditû'nin Na'inbí Sedóví'in dimuu'indáho dívít'aywó'kanwóyí'ní'in dínkhây'ä'.

20 Wí kodit'owa namuu'iví tewhá ee wí sä'äwé ûnsaa óedodi háa kwä' ts'ä'idi napa'andi', hedi ná'i sä'äwé-áho i hääwí shánkí híwó'di namuu'i' óesaa'igi' namuu. Hewänbo wá' wíyá sä'äwé-áho phédá nap'odá napa'andi' nasaa, hedi i-áho i

wähphade híwó? namuupî? hääwí óesaa-ígî?-á namuu.

21 Hääwí yä?dâapî? namuu?iví?wedi ívíyâa?andá, handidí i sâ?áwé hääwí híwó?di óesandi waagi?bá gimúní, hedá Na?inbí Sedóví?indáho ta?gendá gipúwí, hedí idiho wí t'ôe dímääní igî? íví?amídí, hangî? ívíkhây?odi, hedí ná?i t'ôe dímä?i-á híwó? íví?amí.

22 Ná?i híwó?pî? taachan wáy wên e'nûn dâymâa?iví?wedi óyâa?an. Shánkídí bikhäâ-i uvi wówátsi ta?ge mänhûuwídí, hedá Yôesiví?piye? biwhäyu?bé-ídí, hedá t'owa-á ovâyséegíhûuwídí, hedá indádá tsaaginpidíbo-á unthâa-ídí. Kin bi?andá in to?wên yä?dâa?in inbí pí?ná khó?yé dimuudi Yôesiví?piye? dívíyûusukanmâa?in waagi?inbá unmúní.

23 T'owa ánshaapî?in dimuu?in hedá hääwí wänbo wídínhanginnáhpí?in dimuu?indá dívítuhkandodí wí?ovâyt'óyaanípí. Ha?wâa?i hí? dâypiyemâa?in dimuu?indá wí?ná táye dívíwänpit'ayyaa?o?.

24 Hebo to?wên Na?inbí Sedógi? dívít'ôe?o?indá wídínkhây?áhpí t'aytuhkannin dimúní?in, hewänbo shánkídí t'ähkí t'owa-ádí híwó?nin dimúní, hedá híwó?nin háhkannindá bo?atâ?indá dimúní.

25 Dínhây?ä? in to?wên Yôesiví hí? ônséegí?opí?in ovâythayyamí?in piháa díví?o?in, hewänbo kin ovâythayyodi t'ayginpidíbo? ovâyhée?âamí, hedí ma?dânho Yôesi Tádádí ovâykhäge?namí inbí t'aywó?di dâyyoe?amídí, hedânho in ta?gen namuu?in diháhpúwídí,

26 hedí kindidáho inbí hangintan dâywáykéyí,

hedá Penísendiví'wedáho dívíyâa'amí. Idá wên phay ovâyk'û' waagibá i'andi iwe diwhêe, hedího iví pan waagi'inbá dipóedí háa natú waa ho díví'o'.

### 3

#### *Háa napúwí'in i t'ä'gi thaa napowa'ä' ihaydi*

<sup>1</sup> Naa oda' ná'in wítukankhâymáa'in úhanginnání'in: I t'ä'gi thaa napowa'ä' ihaydi báyéki kây'in napuwagít'óe.

<sup>2</sup> T'owa-áho wí'bo dívípiséegíkhâymáa hedá inbí chä' ni'gedida' díví'ánshaakhâymáa. Indá dívíyêngíkhâymáa, kw'áye-á dívípítegekhâymáa, t'owa-á t'ämägi-á ovâytukankhâymáa, inbí yíyá'indá tádá'indá wí'ovây'a'geenípí, kú'daa-á wídívímäänípí, Yôesiví hääwí-á wí'ôn'a'geenípí.

<sup>3</sup> Inbí k'aygi'in wänbo wí'ovâyséegí-ípí, häädi wänbo t'ähki dívíyá'be-í'in didá'í, pí'wên t'owaví'gedá yanäki-á dihí'yêeni, háa diwänpichaa waagá dívíkhâymáa, háa'wänbo dimúni, hedá i híwó'di hääwí namuu'i-á dâyt'áy-í,

<sup>4</sup> inbí k'ema'indá inbí maatu t'owa'indá ná'inbí hánmin dínmuu'inbí mangá ovâykáani, díví'ánshaa'anpídíbo hääwí t'ähki dívíkhâymáa, dívípíphúu-í, Yôesi Tádá dâyséegímá've-íví'wedí indá'ba dívípíhíhchannamí'indá didá'í,

<sup>5</sup> indáho Yôesiví'näpiye' dimuu waabá dívíkanhúuwí, hewänbo háawin iví kay únmuu wänbo wídínhanginnánípí. Ha'wâa'in t'owaví'wedí biyâatä-í.

<sup>6</sup> Wáy wên ha'wâa'in inbí hôeyó wóegé tewhá eeye dits'úya', wáy kwiyä' ánshaapí'in dimuu'in dithaa eeye, kwiyä' báyéki t'aywó'di dâymáa'in



hedá t'ämägi' híwó'pí' taachandi ovâykaygimáa'in, hedi ná'in kí'min kwiyä' in dihôeyó'indá dívísó'dinde' inbí háhkan ovâywhäyu'amídi inbí'näpiye' ovâymá'ídi.

7 Ná'in kwiyä'didá in hôeyó'in háhkannin ovâyt'óyandedi háädi wänbo t'ähki wiyá shánki dida' diháhpúwí'in, hewänbo há'to in ta'gen namuu'in diháhpúwí.

8 Hâ'min háhkannindá in ta'gen namuu'in dâyyoegi'o', hân'oe Jannes-ádi Jambres-ádi Moses-ví hí' dânyoegi'an waabá. Ná'in háhkanninbí ánskaa yä'dâapí'da' dínmuudi inbí whäyu Yôesiví'piyeho wídínchä'muupí.

9 Hewänbo háa dívíkanhon waa há'to híwó' dínpuwí. Iwebo nakeepúwí ánsaapí'in dimuu'in, in wíye senä' Jannes-ádi Jambres-ádi dânpóe waagibá.

*Timothy in ta'gen namuu'in ûnhanginnândi híwó' ikanhúwí*

10 Hewänbo udá áyîngidi ho naa dímû' háa dáykanhon waa, hediho ûhanginná háäwí in t'owa dovâyhá'o'i', hedá háa naví wówátsi donhon waagidá, hedá háäwí ipiye' dáykhääde'indá, hedá háa dáywhäyunde'indá, hedá háa dáybo'atä'o'indá, hedá háa t'owa dovâyséegí'indá, hedá háa dáyää'o'indá.

11 Hedá dímû' háa t'owadi naví whäyu dínmuudi díyanäki'annindá, hedá háa indi dít'ôephadekannannindá. I búu'ú Antioch-á Iconium-dá hedá Lystra-á eeye kin naa dînpóe. Hebo tobá díyanäki'an wänbo', Na'inbí Sedódi ná'i háäwí t'ähki iwedi dîn'aywon.

12 Hedá toʷwên t'ähkí didaʹin inbí wówátsi dâyhûuwíʹin Yôesi Tádá óehíhchanmäänídí, in wáʹ Christ Jesus-víʹin dimuudibo ovâyyanäkí kankhây máa.

13 Hedi náʹin yäʹdâpíʹin t'owa dimuuʹindá hedá in t'owa dâyhôeyóháʹoʹindáho shánkí p'ändíkíʹin ho dipuwagítʹóe. Náʹindá wây-á t'owa-á in taʹgen namuuʹin diwedá ovâyyâakankhây máa, hedá in wáʹ in taʹgen namuu iwedibá dívípiyâakankhây máa.

14 Hewänbo u-á úhanginná toʷwídí wóeháʹannin. hediho téegi t'aagi háa unháhpóeʹin diwe hedá háa biwhâyundeʹin diwá bitsaakéeni.

15 Híyääʹi unmuu ihaydi waabo náʹi taʹkan Yôesi Tádávíʹwedi naʹääʹiʹ úhanginná, hedi náʹi taʹkan namuuʹidibá wóeháʹoʹ háa Christ Jesus-víʹpiyeʹ biwhâyundedi wônʹaywoeniʹin.

16 Hääwí t'ähkí Yôesi Tádáví taʹnin diwe nataʹmuuʹi-á i Yäʹdâaʹi P'oewaaḥhâaviʹwedi naʹäädidaʹ namuu, hediho báyéki nachäʹmuu díkhägeʹnamídi in taʹgen namuuʹin giháhpúwídí, hedá háa híwóʹpíʹ ívíʹoʹin dínthayyamídá, hedá in taʹgeʹin p'ôe namúniʹin dínkeeyamídá, hedá háa iʹge ívihuúwíʹin díhâʹamídá.

17 Hediho náʹin háhkan gihádího naʹin Yôesi Tádágíʹ ívít'ôeʹoʹindáho hääwí t'ähkí gíntáyʹiʹ âymáa hedânho híwóʹígíʹ ívít'ôeʹamídi, hedi hangíʹ wíyá hääbo wígínteʹdéé-ípí.

## 4

1-2 Yôesi Tádáví páadépiyeʹ hedá Naʹinbí Sedó Jesus Christ-ví páadépiyá wítumáa kinnân bíʹamídi: Yôesiví tuu t'owa ovâytuuphadé-í hedá

häädi nanân wänbo unkhâymuní kin bi'amídí. Híwó'pí in t'owa díví'odá ovâythayyamí, hedi ovâytu'âamí ha'wâa wídíví'âamí'ín, hewänbo i híwó'di namuu'ida' dívíkanhúuwí. Häädi waa kin ovâyhá'odi indádi bibo'atã'âamí. Nã'i kin wâytumáa gá Na'inbí Sedó Jesus-di t'ähki t'owa ovâykeekw'ôenidân háa híwó' háa híwó'pí díví'annin, in diwówayi'indá in ho dichuu'indádi, hedi kin ikhâymaa owáy nawáypówádi nap'ó'dédí'sogedee ihaydi.

3 Hediho nää úkhây'ä' Yôesi Tádávi tuu t'owa ovây't'ôe'âamí'in, gá wáy wí thaa naná' diwáho in t'owa in ta'gen háhkan namuu'in há'to dit'óyandá'í, hewänbo shánkídi báyéki hôeyó'in háhkannin ovâytuwákhâymaa, hedi dívíwänpihíhchannamídí didá'í nã'in háhkannindi ovâytu'âamí'in hääwí dit'oeda'ida'.

4 Hedá in ta'gen namuu'in wídit'ôe-ípídi díví'oyephohtidikhâymaa, hewänbo i hí' ta'gen namuupí' pehtsiye waagi'bá namuu'i' dit'ôe-ídi díví'oyephohkhuukhâymaa.

5 Hewänbo u-á úkhây'ä' ta'geda' bí'ánshaa'amí'in, hedá mänt'ôephadendedá biyää'âamí, hedá t'âmäpiye' unyêeni Yôesiví híwó'di tuu in t'owa ovây't'ôe'âamídi, hedá in t'ôe Yôesidi wóeyônnin híwó'dá bikanhúuwí.

6 Nã'i hääwí wítu'an gá nääho Yôesigi' naví ûnp'oe donts'anchar'khâymaadân, naví wówátsi dáypákhâymaa, ihaydiho naná nää oepáa k'aydidi dáyyâa'amídí.

7 Wí tsaa'i háa wí ää'i hânho isó'dinde waagibá naa wá' dáysó'dêe Yôesiví híwó'di t'ôe dôn'amídí,

hedá háa díyôn waagá dônbowa, hedá i háäwí ívíwhäyunde'i-á dó'áyîngi'an.

<sup>8</sup> Hediho in to'wên díví'äädedi páadé dipówá'in wí háäwí dit'anpo' waabá, naa wá' háäwí naagî' dînte'kw'ódi'i' donkekhâymáa, gá naví wówátsi ta'ge donhondân. Na'inbí Sedó Jesus-á namuu i to'wí t'owa ta'ge ovâytukankhâymáa'i háa híwó' háa híwó'pí díví'annin, hedi idáho ná'i dînte'kw'ódi'i' naa dímääní, hewänbo naada'ba yoe, in wé'ge'in t'owa pín ta'ge haydi óetsíkha'máa'in nawáy'ää-ídí, innân wá' hanbá ovâymääní.

### *Wên t'owavî'gedi Paul ita'nan*

<sup>9</sup> Bisó'dêe-í hanwaapídiibo naví'piye' un'ää-ídí.

<sup>10</sup> Demas-didáho díyoe'an, i-á ná'i oepáa k'aydiwi háäwí shánkí iséegídiho', hediho oe Thessalonica búu'úpiye' namää. Crescens-á oe Galatia nangepiyá namää, hedá Titus-á oe Dalmatia nangepiyá.

<sup>11</sup> Näa-á Luke-da'mân naa-adí na'än. Mark-á nâamá'í, i-á ûnkoedi naví t'ôe iwe díkhäge'namí'in.

<sup>12</sup> Tychicus-á oe Ephesus búu'úpiye' dósan.

<sup>13</sup> Hedi un'ädi naví k'éwé'in aa oe Troas búu'ú Carpus-ví'we donyoe'annin dînmá'í, hedá naví ta'di-á wá' dînmá'í, hewänbo shánkídá i púye eedi nata'muu'i ta'di-á.

<sup>14</sup> Alexander i kwäk'udi ihääwípa'idá naa báyéki díyanákí'an, hediho i híwó'pí' dí'andi namuudi Na'inbí Sedódáho báyéki óetuchänukhâymáa.

<sup>15</sup> U-áho hä'i senbí'wedi ó'áyîngi'an, i-á na'inbí hí' t'aygidi iyoe'andi.

16 Páadé naa dítuyó?diwekándí naa wí?bo dáy?aywoenídí dáyhée?an dihaydi tóebo wí?iwínúpí naa díkhäge?namídí. T'ähkídíbo díyoe?an. Naa oda? Yôesidi ovây?owóyé-í?in tobá han díví?an wänbo?.

17 Hewänbo Na?inbí Sedó-á naa-ádi nayidi idän díkhäge?nan, hedá in kay-á dímägi t'ähkí iví tuu t'owa dovây?t'ôe?amídí, hediho t'ähkí in Hudíyo dimuupí?in iwe diyí?in dit'oe. Hedi Yôesidi naa dín?aywon, wí to?wí wí khänbí wää iwedi óewhahké? waabá naa dí?an.

18 Hedi Na?inbí Sedódáho t'ähkí i híwópí? t'owadi díkhâymáa?in dida? iwedi díwhahkéyí, hedá idá oe makówá wáy i natsonnän diwepiye? bahpíbo díhúuwí. Hãnhay wänbo t'ähkí t'owa dínkhây?ä? kw'áayébo? óemá?ve-í?in. Hamân.

### *Wí sengituu namuu?i?*

19 Priscilla-á Aquila-á ovãnsengitú?âamí, hedá in Onesiphorus-ví k'aygiwindá wá?.

20 Erastus-á oe Corinth búu?úbo iwóyí?, hedi Trophimus-á nahaydi oe Miletus búu?ú iwá dóyoe?an.

21 Bisó?dêe-í wa?di nate?núpóepídíbo? unpówá-ídí. Eubulus-dá wóesengitú?an, hedá Pudens-dá Linus-dá, Claudia-dá, hedá t'ähkí in wé?ge?in tí?úuwín páadé?indá inbí sengituu wônsan.

22 Na?inbí Sedó Jesus uví pí?ná khó?yé mänmä?ve-í, hedá iví séegísehkanä-á wóemãáni.

## **Naʼinbí Sedó Yôesiví Tʷʷ / Nanbí Sedó Jôesiví Tun**

### **New Testament in Tewa (USA) (San Juan/Santa Clara)**

copyright © 2012 Wycliffe Bible Translators, Inc.

Language: Tewa

Translation by: Wycliffe Bible Translators

Contributor: Wycliffe Bible Translators, Inc.

Naʼinbí Sedó Yôesiví Tʷʷ (San Juan)/ Nanbí Sedó Jôesiví Tun (Santa Clara)

### **Copyright Information**

© 2012, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Tewa (USA)

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 18 Apr 2025 from source files dated 29 Jan 2022

f775bf1b-8c8a-5c5e-9288-3b9b00387997